

**LITURGIE VIR DIE EREDIENS  
SONDAG 27 JUNIE 2010**

# **AANDDIENS**

**Lees:** 1 Korintiërs 1:18-31  
1 Timoteus 1:12-2:7  
Heidelbergse Kategismus Sondag 6

**Teks:** 1 Korintiërs 1:22-23a  
1 Timoteus 2:5, 6

**Tema:** Christusprediking op sy heel beste.

## **ONTMOETINGSDIENS**

- Votum (sit): Ps 116:1, 7 (p. 569)
- Groetseën
- Lofsang (staan): Ps 118:1, 2 (p. 575)

## **WOORD- EN GEBEDSDIENS**

- Gebed (staan)
- Skriflesing
- Sing (sit): Sb 1-3:1, 3 (op die melodie van “Die Heiland is gebore”)
- Prediking
- Sing as gebed: Sb 10-2

## **ANTWOORDDIENS**

- Kollekte (DvB)
- Sing (staan): Sb 1-2:1-3
- Wegstuurseën
- Sing die Amen: Sb. 13-3

## 1 Korintiërs 1:18-31 (1 Kor 1:22-23a)

<sup>18</sup>Die boodskap van die kruis van Christus is wel onsin vir dié wat verlore gaan, maar vir ons wat gered word, is dit die krag van God. <sup>19</sup>Daar staan tog geskrywe: “Die wysheid van die wyses sal Ek vernietig, en die geleerdheid van die geleerdes sal Ek tot niet maak.” <sup>20</sup>Waar is die wysgeer van hierdie wêreld nou? Waar die skrifgeleerde? Waar die slim woordvoerder? Het God nie die wysheid van die wêreld tot onsin gemaak nie? <sup>21</sup>Dit was die bedoeling van God in sy wysheid dat die wêreld nie deur geleerdheid tot kennis van God sou kom nie. Daarom het God in sy goedheid besluit om deur die prediking wat vir die wêreld onsin is, dié te red wat glo. <sup>22</sup>Die Jode vra wondertekens en die Grieke soek wysheid, <sup>23</sup>maar ons verkondig Christus wat gekruisig is. Vir die Jode is dit ’n aanstoot en vir die ander is dit onsin, <sup>24</sup>maar vir dié wat deur God geroep is, Jode sowel as Grieke, is Christus die krag van God en die wysheid van God. <sup>25</sup>Wat vir die wêreld die onsin van God is, is groter wysheid as die wysheid van mense, en wat vir die wêreld die swakheid van God is, is groter krag as die krag van mense. <sup>26</sup>Dink maar net, broers, aan wat julle was toe julle geroep is. Volgens die opvatting van mense was daar nie baie geleerdes of baie invloedrykes of baie mense van aansien onder julle nie. <sup>27</sup>En tog, wat vir die wêreld onsin is, het God uitgekies om die geleerdes te beskaam; wat vir die wêreld swak is, het God uitgekies om die sterkes te beskaam, <sup>28</sup>en wat vir die wêreld sonder aansien of betekenis is, ja, wat niks is nie, het God uitgekies om wat iets is, tot niet te maak. <sup>29</sup>Voor God het geen mens dus iets om op te roem nie. <sup>30</sup>Aan God is dit te danke dat julle met Christus Jesus verenig is. Hy het vir ons geword die wysheid wat van God kom: die vryspraak, die heiliging en die verlossing. <sup>31</sup>Daarom, soos daar geskrywe staan: “Dié wat wil roem, moet in die Here roem.”

## 1 Timoteus 1:12-2:7 (teks: 1 Tim 2:5, 6)

<sup>12</sup>Teenoor Christus Jesus ons Here is ek dankbaar: Hy het my krag gegee en my betroubaar geag om my in sy diens te stel, <sup>13</sup>al het ek Hom voorheen belaster, vervolgd en beledig. Maar God was genadig teenoor my omdat ek in my ongeloof nie geweet het wat ek doen nie. <sup>14</sup>Ons Here het my oorlaai met sy genade en met geloof en liefde wat ons deel is in Christus Jesus. <sup>15</sup>Dit is ’n betroubare woord en kan sonder voorbehoud aanvaar word: Christus Jesus het in die wêreld gekom om sondaars te verlos. Van hulle is ek die grootste. <sup>16</sup>Maar juis daarom was God my genadig sodat Christus Jesus aan my, as die grootste sondaar, al sy verdraagsaamheid sou betoon en ek ’n voorbeeld kon wees vir almal wat in die toekoms in Hom sou glo om die ewige lewe te verkry. <sup>17</sup>Aan Hom wat vir ewig Koning is, die onverganklike, onsienlike, enigste God, kom toe die eer en die heerlikheid tot in alle ewigheid! Amen.

<sup>18</sup>Hierdie opdrag gee ek aan jou, Timoteus, my kind, in ooreenstemming met die profesieë wat vroeër oor jou uitgespreek is. Met hierdie woorde in gedagte, moet jy die goeie stryd stry. <sup>19</sup>Hou vas aan die geloof en behou ’n goeie gewete. Omdat sommige hulle gewete onderdruk het, het hulle geloof skipbreuk gely. <sup>20</sup>Onder hulle is daar Himeneus en Aleksander, wat ek aan die Satan oorgegee het, sodat hulle daardeur kan leer om God nie te laster nie.

**2** Ek dring daarop aan dat daar in die eerste plek met smeking, voorbidding en danksegging gebid moet word vir alle mense, <sup>2</sup>vir dié wat regeer en vir almal wat gesag uitoefen, sodat ons ’n rustige en stil lewe kan lei in volkome toewyding aan God en in alle eerbaarheid. <sup>3</sup>So is dit goed en aanneemlik vir God, ons Verlosser, <sup>4</sup>wat wil hê dat alle mense gered word en tot kennis van die waarheid kom. <sup>5</sup>Daar is immers net een God, en daar is net een Middelaar tussen God en die mense, die mens Christus Jesus <sup>6</sup>wat Homself as ’n losprys vir almal gegee het. Dit was op die bestemde tyd die bewys van die bedoeling van God. <sup>7</sup>Met die oog hierop is ek aangestel as prediker en apostel, as ’n leraar om die heidennasies te onderrig in die boodskap van die geloof en die waarheid. Ek praat die waarheid, ek lieg nie.